

KE INI JESUS EDIDIDE

1 **Ñwed Thessalonica 4:13-18; 5:1-24.**

QYQHỌ UKPEP-ÑKPỌ 412

Eke Mkparawa

IKỌ IBUOT: “Edi ke ini mme ñkpọ emi etọñode ndiwọrọ, emenere enyin ke enyọñ, enyuñ emenere ibuot mbufo ke enyọñ, koro erifak mbufo ke asaña ekpere” (Luke 21:28).

Mme Ekikere Ndọñesit

Ọbọñ iyomke nditọ Esie enana ifiọk ebaña mme akpanikọ emi edude ke Ñwed Abasi. Nnyin imokot ke 1 Ñwed Thessalonica 4:13 ite “Edi nnyin imañña mbufo enana ifiọk, nditọ-ete, ebaña mmọ emi edede”. Enọ nnyin mme ikọ ndọñesit ke Ñwed Abasi man nnyin ikufuhọ ikaha ke ini emi mkpa emende owo ima nnyin efep.

Mbon emi mibọhọ erinyaña ukpọñ, ke ediwak idaha esitua enyuñ eseme ata eti-eti ke ini mkpa emende owo ima mmọ efep, edi idighe ntre ye mme anditiene-Christ. Ufan me owo ke ufọk ndikpa esida akamba eseme ye mfuhọ ọnọ owo, kpa ye idem eyen Abasi: edi ndọñesit odu ke esit ete ke edieke owo oro ọkọbode erinyaña. Enye odu ye Jesus, ndien nnyin iyetọñ ntak ikut enye. Okposuk edi nte nnyin mikemeke ndifiọk ntak emi mme ñkpọ emi etibede, nnyin ifuhọke “nte mmọ eken eke minyeneke idori-enyin”.

Anditiene-Christ emi ọbode ikot mkpa enyene idorenyin ke esit esie ete ke imọ iyaset usen kiet. Sia Jesus ama ekeset ọwọ ke udi, mbon emi enimde enye akpanikọ eyenyuñ eset ke mkpa. Jesus ama ọdọhọ ete, “Ami ndi eriset ye uwem: owo eke ọbuọtde idem ye Ami, okposuk edi nte enye ama akakpa, enye eyedu uwem” (John 11:25).

Ke Ini Jesus Edidide

Paul, owo-mbet etiñ ọnọ nnyin iñwañ-iñwañ abaña eridi Jesus man edida ñwan-ndọ emi etiede ebet enye ọnyọñ. Edi akpanikọ ete ke eridi Esie eyeda itie, kpa nte mme angel oro eketiñde ke usen edidọk Esie ete, “Jesus emi, emi emende Enye ekpọñ mbufo eduk ke Heaven, eyedi kpa ido emi mbufo ekutde Enye ọnyọñde oduk ke Heaven” (Utom Mme Apostle 1:11).

Nnyin ikot ite: “Koro Ọbọñ ke Idem Esie eyeto ke Heaven ọsuhọre ye mkpo, ye uyo archangel, ye ukorowo Abasi, ndien mmọ emi ekpañade ke Christ eyebem iso eset: ndien eyemen nnyin emi idude uwem, emi isuhọre, edok ye mmọ ke ikpa-enyọñ, man isobo ye Ọbọñ ke enyọñ: ntem ke nnyin idudu ye Ọbọñ ke nsinsi-nsinsi.” Nte idighe oro edi idorenyin ubọñ ye inem ekikere?

Edi mbon emi ebeñede idem ikpọñ-ikpọñ edikop mkpo, ye uyo ukorowo. Eyekpọñ mbon eken. Ke Luke 17:34-36, nnyin ikot ibaña owo iba edinade ke mbri kiet; eyemen kiet ekpọñ enye eken; iban iba eyekọk ibokpot, eyemen kiet ekpọñ enye eken: iren iba eyedu ke iñwañ: eyemen kiet ekpọñ eken.

O ntuña eke owo mikemeke nditiñ eyedu ọnọ mmọ emi edisañade ebe ke Akwa Ukut! Se nte idem enyekde owo ke abaña ndik ndikpọñ enye! Edi akam ọdọdiok akan ke edade edomo ye ndutuhọ eke ebetde ukpọñ emi miketiñke enyin inam mbeñe-idem, eyenyuñ enọ enye aka ebiet ndutuhọ emi Ikọ Abasi ekpepde nnyin ete ke “ikañ inyuñ inimeke”.

Nte Inọ

Akpa ubak ke itie edikot ñwed edi ikọ ndọñ-esit ọnọ nnyin, edi ñkañ eken edi mme ikọ nduri-utọñ. Ọbọñ ekeme ndidi usọp-usọp! Nte inọ ke okoneyo! Inọ ekeme ndiberede usuñ-ofum (window) suñ-suñ midighe ntre enye eberede usuñ onyuñ oduk ufọk inyuñ ifinake me ede idap ke ufọk oro. Edi ke ini Jesus edide Enye ididukke kpukpru ufọk edi “eyemen nnyin edok ... man isobo ye Ọbọñ ke enyọñ.” Jesus eyeduri mmọ emi edude ke mbeñe-idem nte akwa magnet adian ke idem Esie; mmọ emi esuhode eyefiok ini kiet ete ke owo ama ediyip mme “ata inyene.” Ọbọñ okot mmọ emi ebakde enye enyuñ ekerede, enyuñ etiñde ebaña enye, “ata inyene” Esie. “Mmọ eyedi ata inyene mi ke usen emi ami ndoride” (Malachi 3:17).

Ọbọ̀n eyedi ke ini eke owo midorike enyin. Ke Matthew 25, nnyin imokut ndise eridi Ọbọ̀n ke ini nditọ́ iban duop “eyetde idap ede.” Ndien ke ufọt okoneyo efiori ete “Sese, ọdọ-ndọ! Mbufo ewọ̀nọ́ eka ekesobo ye enye.”

Mme Idiọ̀nọ́

Usen kiet mbet Jesus ema ebup enye ete, “Sian nnyin ini eke mme ńkpọ́ emi edidide; nso idinyuń idi idiọ̀nọ́ eridi Fo, ye eke akpatre ini eyo emi?” (Matthew 24:3-12). Jesus ama asian mmọ́ ete ke ekọ̀n eyedu, akań, mme idiọ̀k udọ̀nọ́, unyek-isọ̀n ye mme nsu-nsu anditiń ntiń-nnim ikọ́ (me mme ọkwọ̀rọ́-ikọ́) ye ukwańido eke ọyọ̀họ́de ke isọ̀n. Kpukpru ńkpọ́ emi ema eda itie. Unyek-isọ̀n eneńede awak eti-eti ke mme isua emi nnyin idude mi ke esit.

Mme idiọ̀nọ́ eken emi ewutde nnyin nte eridi Jesus ekperede edi: iseri ke edu-uwem mme owo, nsu, edisuń Abasi, nsọ̀n ibuot ye mme ete ye mme eka, edisin esit ke ńkpọ́ owo, edima mbre ńkan nte emade Abasi. Mkparawa iren ye iban emi mmibọ̀họ́ erinyańa ukpọ̀n enam ediwak ńkpọ́ emi.

Ntiń-enyin

“Mmọ́do ndien, eyak nnyin ikude idap, nte mmọ́ eken, edi eyak nnyin itaba idap ikpeme, imum idem ikama.” Emi iwọ̀rọ́ke ite ke nnyin ikpataba idap itie ke ofuri okoneyo inyuń iduọ̀kke odudu. Jesus oyom nnyin itie ikpeme ke abańa edinam mbeńidem emi edide akpan ńkpọ́. Ke ini nnyin ima ikọ́bọ́ erinyańa ukpọ̀n, ana nte eyet esit nnyin asana ofuri-ofuri, inyuń ibọ́ Iberedem Edisana Spirit. Nnyin imọ́fiọ̀k ite ke mme usen ediọ̀k, ndien akpana nte nnyin itaba idap inyuń ikpeme ke ntak emi; akpana nnyin ika iso ikpeme, ibọ̀n akam inyuń ikpep Ikọ́ Abasi kpukpru usen man oto do nnyin idu ke mbeńidem. Nnyin ikpenyene ndiduńore esit nnyin ndikut nte ke nnyin iyakke ńkpọ́ eke edikpande nnyin ndidu ke mbeńidem ebe oduk. Ikpiķpu ikọ́ ye mme idiọ̀k edinam ekeme ndiduri nnyin ńkpọ̀n Ọbọ̀n.

Akpatre ubak ke itie edikot ńwed abańa mme item ndińwam nnyin ndidu ke mbeńidem. Mme item emi inyeneke mme idiọ̀k owo edi enyene anditiene-Christ. Etop emi enyene “nditọ́-ete” emi ekerede ndisobo ye Jesus ke ini Enye edidide. Eyak nnyin itim ikot mmọ́; mme ufań esie edi mbio mbio inyuń esọp ndińwańa owo.

Paul, owo-mbet etre enye ke ndidọ́họ́ nte ke akam eke imọ́ ibọ̀nde inọ́ Abasi edi Enye ndikpeme nnyin man “ikunyene ndo ke ini Ọbọ̀n nnyin Jesus Christ edidide. Enye emi okokotde mbufo edi Abasi akpanikọ́; enye eyenyuń anam se Enye ọkọ̀nwońọ́de osu”. “Ndinana ndo” edi ńkoń-koń idaha, edi ana nnyin iyom enye. Peter ama ewet abańa mmọ́ emi eketiede ebet edidi Jesus onyuń ọdọ́họ́ ete, “Sia mbufo etiede ebet mme ńkpọ́ emi, enyene ifik ndien, man enye okposim mbufo nte etiede ke emem, enana ntọ́i, inyuń enana ndo ke enyin Esie” (2 Peter 3:14).

Mbeńidem Me Unana Mbeńidem

Nte ekikere editọ̀nọ́ ntak ndi Jesus ada idara edi ke esit fo? Nte afo okutde mme idiọ̀nọ́ edidi Esie nte etọ́tde ekanade fi ekuk, nte ọdọ̀n fi nte Enye ekpedide? Nte uduak ye udọ̀n ini iso fo asańa ye ekikere ke abańa Christ ndidi iwiwa? Kpukpru uduak ke uwem nnyin ọkpọ́kọ̀nọ́ ke ekikere emi, “Ke Ọbọ̀n onyimede” mme “Ke Jesus ebighide ndidi.”

Me ekikere edidi Esie eda ndik ye nnyek idem edi esit fo? Nte afo odori-enyin ete ke Enye ididighe kańa? Nte mme ńkpọ́ inemesit fo ekọ̀nọ́ ke mme ńkpọ́ ererimbot emi? Nte ńkpọ́sọ̀n udọ̀n ini iso ada ini fo tutu afo oyom Jesus ebighe ndidi?

Itie edikot ńwed etiń abańa oruk owo iba: nditọ́ uńwana ye eke ekim. Afo odu ke ewe otu? Nte afo odu ke otu mmọ́ emi “ekpemedede” me ke otu mme “ede idap”? Ti ete ke edi mmọ́ eke edude ke mbeńidem ikpọ̀n-ikpọ̀n edikop “ukorowo Abasi” ke ini enye edide ke Ntań ndọ́k.

MME MBUME

- 1 Mme anie edikop uyo ukorowo ke ini Ọbọ̀n edide?
- 2 Mme anie edibem iso eset edisobo ye Enye ke enyọ̀n?
- 3 “Ndide ye Jesus” ọwọ̀rọ́ didie?
- 4 Didie ke Jesus ediwara ndidi?

- 5 “Nditọ uñwana” ọwọrọ nso?
- 6 Nso ke ana nte nnyin inam man ibeñeidem ibet edidi Jesus?
- 7 “Ndida idiọk nsio owo usiene idiọk” ọwọrọ didie?
- 8 Nso ñkpọ ition ke edọhọ nnyin inam ke utit ọyọhọ ibuot ñwed ition?
- 9 Siak idiọnọ itiaita emi enamde nnyin ifiọk ite ke edidi Christ ke ekpere.